

Hubert Booi - Lio - a nace na Bonaire dia 25 di juli 1919. For di 1937 e ta biba na Aruba. Su intencion tabata pa bira pader, pero destino a dicidi otro. For di hopi aña caba Lio ta conoci como poeta, autor, pintor, musico, culturista y bon conocedo di Papiamentu; e ta un artista completo.

E tabata bankero, djei el a traha na gobierno na Oficina di Turismo, Oficina di Informacion, na Departamento pa Cultura y Educacion y na Instituto di Cultura. Lio a siña latin y tambe ruso, sin conta su conocimiento amplio den hulandes, ingles, spaño y frances. Lio ta creador di e texto di Himno di Bonaire. E tin hopi poema y hopi texto literario riba su nomber. Tambe el a skirbi obra di teatro, entre otro: E perla di Caribe na 1955, Golgotha publica na 1967, Amor di Kibaima na 1969. El a skirbi e buki Muchila. E ta un auto-didacta cu specialisacion den idioma Papiamentu. E tabata miembro di comisionnan di ortografia Daantje, Romer y Maduro.

El a crea e programa di television Nos Tera, pa cua e mes tabata prepara programanan riba idioma, literatura, folklore, musica y conocimiento general. E mes tabata prepara e contenido y presenta e programanan tambe. Ultimamente Lio a traduci e cantica clasico spaño Granada na hulandes; el a traduci y canta Abo so di Padu Lampe na hulandes cu Caha di Orgel di Nelson Sprok. E luna aki Editorial Charuba a publica y presenta su antologia: E flamingo di Aruba.

Ito Tromp
6 di maart 2007